

expliqua celuy de l'Annonciation de nostre Dame, quelques miracles de N. S. sa mort & Passion. En fin le P. Super. invita la [244] compagnie à son baptesme pour le lendemain matin iour de la tres-saincte Trinité, cette iournée nous a esté peut-estre vne des plus belles que nous ayons iamais eu en ce país. Du grand matin le P. Superieur baptisa vn vieillard fort malade, qui mourut deux ou trois iours apres: de là nous allasmes pour voir nostre catecumene, mais il estoit chez nous; Le Pere l'instruisit encor auant la ceremonie, nommément sur la communion. Nostre Chapelle estoit extraordinairement bien ornée, elle occupoit la moitié de nostre cabane, aussi n'y fismes nous point de feu ce iour là: nous auions dressé vn portique entortillé de feuillage, meslé d'oripeau, en vn mot nous auions estallé tout, ce que vostre R. nous a enuoïé de beau, iamais on n'auoit rien veu de si magnifique en ce pays. Toutefois la piece la plus rare estoit nostre profelite, aussi toute l'affistance auoit les yeux arrestez sur luy: on auoit bien veu baptiser quantité de petits enfans en nostre cabane, mais qu'vn homme de son aage, & en estat de fanté se presentast pour receuoir le baptesme, c'est ce qui ne s'estoit point encor veu. Au commencement de la ceremonie il parut vn peu honteux, & trembloit de tout le corps; & comme le P. Superieur l'interrogeoit il se perdit, & luy dist tout bas *Echon* ie [245] n'entends rien à respondre; neantmoins quand il n'estoit question que d'vn ouïy ou d'vn non, il parloit si haut & si distinctemēt, qu'il vous ostoit tout fujet de douter de la sincerité de son cœur, & mesme cette pudeur qui paroïssoit sur son front, nous faisoit voir comme à decouuert, la droiture de ses intentions en vne